

नमो नमो निम्मलदंसणस्स

पू. आनंद-क्षमा-ललित-सुशील-सुधर्मसागर गुरुभ्यो नमः

२३

वण्हिदसाणं- बारसमं उवंगसुत्तं

मुनि दीपरत्नसागर

Date : / / 2012

Jain Aagam Online Series-23

२३**गंथाणुककमो**

कमंको	अज्झयणं	सुत्तं	गाहा	अणुककमो	पिडंको
१	पढमं-निसडे	१-१	१-	१-३	२
२	बीअं (जाव) बारसमं - मायणि - वह - वेहल - पगय - जुत्ती - दसरह - दढरह - महाधनु - सत्तधनु - दसधनु - सयधनु	१-२	-	४-५	५

२३

वण्हिदसाणं- बारसमं उवंगसुत्तं

० पढमं अज्झयणं- निसढे ०

[१] जइ णं भंते समणेणं भगवया महावीरेणं जाव संपत्तेणं उवंगाणं चउत्थस्स वग्गस्स पुप्फचूलियाणं अयमढ्ढे पन्नत्ते पंचमस्स णं भंते! वग्गस्स उवंगाणं वण्हिदसाणं समणेणं भगवया जाव संपत्तेणं के अढ्ढे पन्नत्ते ?, एवं खलु जंबू! जाव दुवालस अज्झयणा पन्नत्ता तं जहा:- ।

[२] निसढे मायणि-वह-वहे पगया जुत्ती दसरहे दढरहे य ।

महाधनू सत्तधनू दसधनू नामे सयधनू य ॥

[३] जइ णं भंते! समणेणं भगवया महावीरेणं जाव संपत्तेणं उवंगाणं पंचमस्स वग्गस्स वण्हिदसाणं दुवालस अज्झयणा पन्नत्ता, पढमस्स णं भंते! उक्खेवओ० एवं खलु जंबू! तेणं कालेणं तेणं समएणं बारवई नामं नयरी होत्था दुवालस-जोयणायामा नवजोयणवित्थिण्णा जाव पच्चक्खं देवलोयभूया पासादीया० तीसे णं बारवईए नयरीए बहिया उत्तरपुरत्थिमे दिसीभाए एत्थ णं रेवतए नामं पव्वए होत्था, तुंगे गगनतलमनुलिहंतसिहरे नानाविह रुक्ख-गुच्छ-गुम्म-लया-वल्ली-परिगयाभिरामे हंस-मिय-मयूर-कोंच-सारस-चक्कवाग-मदनसाला-कोइलकुलोववेए तड-कडग-विवर-उज्झर-पवाल-पब्भारसिहरपउरे अच्छ-रणगण-देव-संघ-विज्जाहरमिहुण-संनिचित्ते निच्चच्छणए दसार-वर-वीरपुरिस-तेल्लोक्कबलवगाणं सोमे सुभए पियदंसणे सुरूवे पासादीए जाव पडिरूवे ।

तस्स णं रेवयगस्स पव्वयस्स अदूरसामंते एत्थ णं नंदनवने नामं उज्जाणे होत्था-सव्वोउय पुप्फ जाव पडिरूवे, तत्थ णं नंदनवने उज्जाणे सुरप्पिए नामं जक्खस्स जक्खाययणे होत्था- चिराईए जाव बहुजनो आगम्म अच्चेइ सुरप्पियं जक्खाययणं, से णं सुरप्पिए जक्खाययणे एगेणं महया वनसंडेणं सव्वओ समंता संपरिक्खित्ते जहा पुन्नभद्दे जाव पुढविसिल्लावट्टए तत्थ णं बारवईए नयरीए कण्हे नामं वासुदेवे राया होत्था जाव रज्जं पसासेमाणे विहरइ ।

से णं तत्थ समुद्धविजय पामोक्खाणं दसण्हं दसाराणं बलदेव पामोक्खाणं पंचण्हं महावीराणं उग्गसेन पामोक्खाणं सोलसण्हं राईसाहस्सीणं पज्जुन्न पामोक्खाणं अद्दुट्ठाणं कुमार कोडीणं संब पामोक्खाणं सट्ठीए दुदंतसाहस्सीणं वीरसेण पामोक्खाणं एककवीसाए वीरसाहस्सीणं रुप्पिणि पामोक्खाणं सोलसण्हं देवीसाहस्सीणं अनंगसेना पामोक्खाणं गणिया-साहस्सीणं अन्नेसिं च बहूणं राईसर जाव सत्थवाहप्पभिईणं वेयड्ढगिरि सागर मेरागस्स दाहिणड्ढ भरहस्स आहेवच्चं जाव विहरइ, तत्थ णं बारवईए नयरीए बलदेवे नामं राया होत्था-महयाहिमवंत जाव रज्जं पसासेमाणे विहरइ ।

तस्स णं बलदेवस्स रण्णो रेवई नामं देवी होत्था सूमालपाणिपाया जाव विहरइ, तए णं सा रेवई देवी अन्नया कयाइ तंसि तारसगंसि सयणिज्जंसि जाव सीहं सुमिणं पासित्ता णं पुडिबुद्धा, एवं सुमिणदंसणपरिकहणं, कलाओ जहा महाबलस्स, पन्नासओ दाओ पन्नासं रायवरकन्नगाणं एगदिवसेणं पाणिग्गहणं नवरं-निसढे नामं जाव उप्पिं पासाए विहरइ, तेणं कालेणं तेणं समएणं अरहा अरिद्धनेमी अज्झयणं-१

आइगरे दसधणूइं वण्णओ जाव समोसरिए, परिसा निग्गया,

तए णं से कण्हे वासुदेवे इमीसे कहाए लद्धट्टे समाणे हट्टुट्टे० एत्तो य कोडुंबियपुरिसं सद्दावेइ सद्दावेत्ता एवं वयासी- खिप्पामेव भो देवाणुप्पिया! सभाए सुहम्माए सामुदानियं भेरिं तालेहि, तए णं से कोडुंबियपुरिसे जाव वयणं पडिसुणित्ता जेणेव सभाए सुहम्माए सामुदानिया भेरी तेणेव उवागच्छइ उवागच्छित्ता सामुदानियं भेरिं महया-महया सद्देणं तालेइ, तए णं तीसे सामुदानियाए भेरीए महया-महया सद्देणं तालियाए समाणीए समुद्धविजयपामोक्खा दस दसारा देवीओ जाव अनंगसेनापामोक्खा अनेगा गणियासहस्सा अन्ने य बहवे राईसर जाव सत्थवाहप्पभिइओ ण्हाया जाव पायच्छित्ता सव्वालंकार-विभूसिया जहा विभवइइढी सक्कारसमुद्धएणं अप्पेगइया हयगया जाव पुरिसवग्गुरा-परिक्खित्ता जेणेव कण्हे वासुदेवे तेणेव उवागच्छंति उवागच्छित्ता करतल जाव कण्हं वासुदेवं जएणं विजएणं वद्धावेंति, तए णं से कण्हे वासुदेवे कोडुंबियपुरिसे सद्दावेत्ता एवं वयासी:- ।

खिप्पामेव भो देवाणुप्पिया! आभिसेक्कहत्थिं रयणं पडिकप्पेह हय-गय-रह-पवर जाव पच्चप्पिणंति, तए णं से कण्हे वासुदेवे जेणेव मज्जणघरे जाव दुरूढे अट्टट्ट मंगलगा जहा कूणिए सेयवरचामरेहिं उद्धुव्वमाणेहिं-उद्धुव्वमाणेहिं समुद्धविजयपामोक्खेहिं दसहिं दसारेहिं जाव सत्थवाहप्पभिइहिं सद्धिं संपरिवुडे सव्विइढीए जाव दुंदहिं-निग्घोसणाइवरवेणं नयरिं मज्झंमज्झेणं निग्गच्छइ सेसं जहा कूणिओ जाव पज्जुवासइ ।

तए णं तस्स निसढस्स कुमारस्स उप्पिं पासायवरगयस्स तं महया जनसद्धं च जहा जमाली जाव धम्मं सोच्या निसम्मं वंदइ नमंसइ वंदित्ता नमंसित्ता एवं वयासी सद्दहामि णं भंते! निग्गंथं पावयणं जहा चित्तो जाव सावगधम्मं पडिवज्जइ पडिवज्जित्ता पडिगए ।

तेणं कालेणं तेणं समएणं अरहओ अरिद्धनेमिस्स अंतेवासी वरदत्ते नामं अनगारे उराले जाव विहरइ, तए णं से वरदत्ते अनगारे निसढं कुमारं पासइ पासित्ता जायसइढे जाव पज्जुवासमाणे एवं वयासी- अहो णं भंते! निसढे कुमारो इट्टे इट्टरूवे कंते कंतरूवे एवं पिए मणुण्णे मणामे मणामरूवे सोमे सोमरूवे पियंदसणे सुरूवे, निसढेणं भंते! कुमारेणं अयमेयारूवा माणुयइइढी किण्णा लद्धा किण्णा पत्ता पुच्छा जहा सूरियाभस्स,

एवं खलु वरदत्ता! तेणं कालेणं तेणं समएणं इहेव जंबुद्धीवे दीवे भारहे वासे रोहीडए नामं नयरे होत्था रिद्धत्थि-मिय-समिद्धे, मेहवण्णे उज्जाणे, मणिदत्तस्स जक्खस्स जक्खाययणे, तत्थ णं रोहीडए नयरे महब्बले नामं राया, पउमावई नामं देवी अन्नया कयाइ तंसि तारसगंसि सयणिज्जंसि सीहे सुमिणे एवं जम्मणं भाणियव्वं जहा महाबलस्स नवरं-वीरंगओ नामं बत्तीसओ दाओ बत्तीसाए रायवरकन्नगाणं पाणिं जाव उवगिज्जमाणे-उवगिज्जमाणे पाउस-वरिसारत्त-सरय-जाव वसंते छप्पि उऊ जहाविभवेणं भुंजमाणे-भुंजमाणे कालं गालेमाणे इट्टे सद्द जाव विहरइ,

तेणं कालेणं तेणं समएणं सिद्धत्थ नाम आयारिया जाइसंपन्ना जहा केसी नवरं बहुस्सुया बहुपरियारा जेणेवे रोहीडए नयरे जेणेव मेहवण्णे उज्जाणे जेणेव मणिदत्तस्स जक्खस्स जक्खाययणे तेणेव उवागया, अहापडिरूवं जाव विहरंति, परिसा निग्गया, तए णं तस्स वीरंगयस्स कुमारस्स उप्पिं पासायवरगयस्स तं महया जणसद्धं जहा जमाली निग्गओ, धम्मं सोच्चा, जं नवरं देवाणुप्पिया! अम्मापियरो आपुच्छामि जहा जमाली तहेव निक्खंतो जाव अणगारे जाए जाव गुत्तबंभयारी, अज्झयणं-१

तए णं से वीरंगए अनगारे सिद्धत्थाणं आयरियाणं अंतिए सामाइयमाइयाइं जाव अक्कारस अंगाइं अहिज्जइ, बहूहिं चउत्थ जाव अप्पाणं भावेमाणे बहुपडिपुन्नाइं पणयालीसं वासाइं सामण्ण-परियागं पाउणित्ता दोमासियाए संलेहणाए अत्ताणं झूसित्ता सवीसं भत्तसयं अणसणाए छेइत्ता आलोइय-पडिक्कंतं समाहिपत्ते कालमासे कालं किच्चा बंभलोए कप्पे मनोरमे विमाने देवत्ताए उववन्ने, तत्थ णं अत्थेगइयाणं देवाणं दससागरोवमाइं ठिई, तत्थ णं वीरंगयस्स देवस्स दससागरोवमाइं ठिई से णं वीरंगए देवे ताओ देवलोगाओ आउक्खएणं जाव अनंतरं चयं चइत्ता इहेव बारवईए नयरीए बलदेवस्स रन्नो रेवईए देवीए कुच्छंसि पुत्तत्ताए उववन्ने,

तए णं सा रेवईदेवी तंसि तारिसगंसि सयणिज्जंसि सुमिणदंसणं जाव उप्पिं पासाय-वरगए विहरइ, तं एवं खलु वरदत्ता! निसढेणं कुमारेणं अयमेयारूवा उराला मणुयइड्डी लद्धा पत्ता अभिसमन्नागया ।

पभू णं भंते! निसढे कुमारे देवाणुप्पियाणं अंतिए जाव पव्वइत्तए ? हंता पभू, से एवं भंते! से एवं भंते! वरदत्ते अनगारे जाव अप्पाणं भावेमाणे विहरइ, तए णं अरहा अरिद्धनेमी अन्नया कयाइ बारवईओ नयरीओ जाव बहिया जनवयविहारं विहरइ, तए णं से निसढे कुमारे समणोवासए जाए-अभिगयजीवाजीवे जाव विहरइ, तए णं से निसढे कुमारे अन्नया कयाइ जेणेव पोसहसाला तेणेव उवागच्छइ उवागच्छित्ता जाव दब्भसंथारोवगए विहरइ, तए णं तस्स निसढस्स कुमारस्स पुव्वरत्तावरत्तकालसमयंसि धम्मजागरियं जागरमाणस्स इमेयारूवे० समुप्पज्जित्था तं धन्ना णं ते गामागार जाव सन्निवेसा जत्थ णं अरहा अरिद्धनेमी विहरइ, धन्ना णं ते राईसर जाव सत्थवाहप्पभिइओ जे णं अरहं अरिद्धनेमिं वंदंति जाव पज्जुवासंति, तं जइ णं अरहा अरिद्धनेमी पुव्वाणुपुव्विं चरमाणे गामाणुगामं दूइज्जमाणे नंदनवने विहरेज्जा तो णं अहं अरहं अरिद्धनेमिं वंदिज्जा जाव पज्जुवासिज्जा,

तए णं अरहा अरिद्धनेमी निसढस्स कुमारस्स अयमेयारूवं अज्झत्थियं जाव वियाणित्ता अट्टारसहिं समणसहस्सेहिं जाव नंदनवने उज्जाणे समोसढे, परिसा निग्गया, तए णं निसढे कुमारे इमीसे कहाए लद्धे समणे हट्टुत्ते० चाउग्घंटेणं आसरहेणं निग्गए जहा जमाली जावं अम्मापियरो आपुच्छित्ता पव्वइए, अनगारे जाए- इरियासमिए जाव गुत्तबंभयारी,

तए णं से निसढे अनगारे अरहओ अरिद्धनेमिस्स तहारूवाणं थेराणं अंतिए सामाइयमाइयाइं एक्कारसं अंगाइं अहिज्जइ अहिज्जित्ता बहूहिं चउत्थं-जाव विचित्तेहिं तवोकम्महिं अप्पाणं भावेमाणे बहुपडिपुन्नाइं नव वासाइं सामण्णपरियागं पाउणइ पाउणित्ता बायालीसं भत्ताइं अणसणाए छेइत्ता आलोइय-पडिक्कंते समाहिपत्ते आनुपुव्वीए कालगए, तए णं से वरदत्ते अनगारे निसढं अनगारं कालगयं जाणित्ता जेणेव अरहा अरिद्धनेमी तेणेव उवागच्छइ उवागच्छित्ता जाव एवं वयासी:- ।

एवं खलु देवाणुप्पियाणं अंतेवासी निसडे नामं अनगारे पगइभद्वए जाव विनीए, से णं भंते! निसडे अनगारे कालमासे कालं किच्चा कहिं गए ? कहिं उववन्ने ?, वरदत्तादि! अरहा अरिद्वनेमि वरदत्तं अनगारं एवं वयासी- एवं खलु वरदत्ता! मम अंतेवासी निसडे नामं अनगारे पगइभद्वे जाव विणीए मम तहारूवाणं थेराणं अंतिए सामाइयमाइयाइं एक्कारस अंगाइं अहिज्जित्ता बहुपडिपुण्णाइं नववासाइं सामण्ण परियागं पाउणित्ता -***- जाव -***- सव्वडुसिद्धे वीमाने देवत्ताए उववन्ने तत्थ णं० निसदस्स देवस्स अज्झयणं-१

तेत्तीसं सागरोवमाइं ठिई पन्नत्ता ।

से णं भंते! निसडे देवे ताओ देवलोगाओ आउक्खएणं जाव अनंतरं चयं चइत्ता कहिं गच्छिहिति० ? वरदत्त! इहेव जंबुद्वीवे दीवे महाविदेहे वास उण्णाए नयरे विसुद्धपिडमाइवंसे रायकुले पुत्तत्ताए पच्चायाहिइ, से णं उम्मुक्कबालभावे विण्णयपरिणयमेत्ते जोव्वणगमणुप्पत्ते तहारूवाणं थेराणं अंतिए केवलबोहिं बुज्झिहिइ बुज्झिहित्ता अगाराओ अणगारियं पव्वज्जिहिइ से णं तत्थ अनगारे भविस्सइ- इरियासमिे जाव गुत्तबंभयारी,

से णं तत्थ बहूहिं चउत्थ० आइ विचित्तेहिं तवोकम्महिं अप्पाणं भावेमाणे बहुइं वासाइं सामण्ण परियागं पाउणिस्सत्ति पाउणिस्सत्ता मासियाए संलेहणाए अत्ताणं झूसेत्ता सट्ठिं भत्ताइं अनसनाए छेदेहिइ जस्सट्ठाए कीरइ नग्गभावे मुंडभावे अण्हाणाए अदंतवणाए अच्छत्तए अनोवाहणाए फलह-सेज्जा कट्ठसेज्जा केसलोए बंभचेरवासे परघरवेसे पिंडवओ लद्धावलद्धे उच्चावया गामकंटगा अहियासिज्जंति तमट्ठं आराहेहिति आराहेत्ता चरिमेहिं उस्सासनिस्साहेहिं जाव सव्वदुक्खाणं अंतं काहिइ, एवं खलु जंबू! समणेणं भगवया महावीरेणं जाव संपत्तेणं निक्खेवओ० ।

0 २-१२-अज्झयणाणि 0

[४] एवं सेसावि एक्कारस अज्झयणा नेयव्वा संगहणी अनुसारेणं एवं अहीनमइरित्तं एक्कारससु वि, त्ति बेमि ।

मुनि दीपरत्नसागरेण संशोधिताः सम्पादिताश्च “वण्हिदसाणं उवंगसुत्तं” सम्मत्तं

२३	<p>वण्हिदसाणं- बारसमं उवंगसुत्तं</p> <p>सम्मत्तं</p>
----	--